


Garantir l'avegnir d'ina gasetta quotidiana surregiunala – i fa prescha

■ L'existenza da La Quotidiana è segrada per il mument mo enfin il davos dal 2018. Co vai vinavant silsuenter cun ina gasetta surregiunala per ils Rumantschs e las Rumantschas? Gia dapi in onn èsi enconuscent che la Samedia na vul betg pli edir la gasetta sco fin qua. In concept concret per l'avegnir n'è anc betg sin maisa. Nus redactors e redacturas da l'Agentura da novitads rumantscha (anr) fashain quitads e prendain posizium. L'onn proxim festivescha la Lia Rumantscha ses 100avel anniversari. La festa fiss pauc legraivla sch'i muriss gist quel onn in dals pli impurtants meds per derasar e promover il pled scrit. L'institut «Link» ha constatà l'onn passà en ina retschertga represchentativa cun Rumantschs che 83 pertschient èn da l'avis ch'i dovria ina gasetta dal di. Era l'appel sin www.proquotidiana.ch ha mussà a moda impressiuanta la simpatia per la gasetta dal di.

Nus redactors pledain perquai clermain per ina gasetta quotidiana surregiunala en furma stampada e digitala. Per garantir en l'avegnir cuntinuitad ed independenza essan nus da l'avis ch'i dovra ina organisaziun purtadra. Gliez po esser ina organisaziun gia existenta sco per exempel l'anr, la Pro Svizra Rumantscha, la Lia Rumantscha u er ina nova organisaziun. Questa purtadra publitgescha la gasetta en collavuraziun cun in editur che metta a disposiziun il support tecnic, procura per la stampa e derasaziun e po nizzegiar la gasetta per inserar e far reclama. Fitg impurtanta è plinavant ina meglra tgira d'abunents che fin qua.

Da vart redacziunala duess ins endrizzar ina nova plattafurma digitala comunabla nua che Radiotelevisiun Svizra Rumantscha (RTR) e l'anr mettan a disposiziun a tuttas medias rumantschas ils cuntegn publitgads. Da



L'institut «Link» ha constatà l'onn passà en ina retschertga represchentativa cun Rumantschs che 83 pertschient èn da l'avis ch'i dovra ina gasetta dal di. Malgrà che La Quotidiana è segrada mo enfin il davos da l'onn 2018 n'exista anc nagin project co cuntinuar cun ina gasetta dal di surregiunala.

quai na profitescha betg sulet la gasetta quotidiana, mabain cunzunt era la «Posta Ladina» e «La Pagina da Surmeir» che pon sa servir gratuit d'ina pli vasta purschida schurnalistica. Forsa èn las duas gasettas regiunalas gea era prontas da metter a disposiziun las atgnas contribuziuns sin la plattafurma da barat.

Tut quai na mettan ins dentant betg en pe dad in di sin l'auter u entaifer paucas emnas. Perquai èsi necessari dad ac-

celerar las lavurs e dad inoltrar tant pli svelt in concept concret a la confederaziun che segirescha, speranza, ensemen cun il chantun, ina finanziaziun adequata e duravla.

Nus schurnalists lavurain malgrà grond squitsch e finanzas stgarsas cun tschaffen per la gasetta. Magari essan nus perfin in zichel loschs ch'i ans reusescha cun mo otg plazzas cumplainas – e cun sustegn generus e pragmatic dad RTR – da publitgar mintga di ina gaset-

ta surregiunala en tshintg idioms ed en rumantsch grischun. Ultra da quai furnin nus era las contribuziuns necessarias per las duas gasettas regiunalas. Entaifer ils proxims 15 onns vegn ina nova generaziun a surpigiar il rispli ed il timun schurnalistic tar l'anr e tar la gasetta dal di. A la nova squadra redacziunala giavischain nus in fundament pli solid e franc da far gasetta che quai che nus l'avain gi' ils ultims ventg onns. Davart las raschuns pertge ch'i dovra ina gaset-

ta quotidiana rumantscha è vegnì scrit blier ils ultims mais. Nus resumain intgins arguments:

La fermezza d'ina gasetta è ch'ella po rapportar detagliadamain. Sper l'infurmaziun ademplescha ina gasetta rumantscha automaticamain era la funcziun da promover il linguatg. Senza ina gasetta quotidiana perdan las regiuns la suletta plattafurma che derasa mintga di ils idioms. Il pled scrit è indispensabel per il surviver dad ina minoritad linguistica.

Ils ultims onns è La Quotidiana sa profilada sco forum d'opiniuns. In'entira squadra da columnists e da columnistas da tuttas vegliadetgnas raquintan a moda captivanta da la vita e dad experientschas en ed ordaifer il Grischun. Mintga Rumantsch e mintga Rumantscha po far enconuscent ses avis en brevs da lecturs, rapportar da sia uniuon u dad activitads en ses vitg. Senza ina gasetta quotidiana giess a perder questa chaschun da publitgar gratuit contribuziuns da tut gener. Era discussiuns davart fatgs interns da la Rumantschia na pudessan betg pli vegnir manadas publicamain a moda uschè extendida.

Ils ultims mais han ins udì e legì postulats da tuttas guisas: Ils giavischs van dad ina gasetta gratuita distribuida en mintga chasada rumantscha enfin tar ina gasetta che cumpara be pli online u mo pli ina giada l'emna. La redacziun da l'anr pleda en mintga cas per ina gasetta quotidiana surregiunala stampada e digitala. Quai correspunda er a las enconuschientschas da «Link». L'institut da retschertga ha numnadamain constatà ch'ina gronda part dals abunents da La Quotidiana – betg mo ils vegls, mabain era lecturs tranter 18 e 34 onns – na pon betg s'imaginar che la gasetta cumpara be pli en furma digitala.